

Бир бор экан, бир йўк экан, бир кампир билан бир чол бор экан. Улар овчилик билан кун ўтказар эканлар. Бир кун чол тузок пойлаб ўтирган экан, тузокка катта бир лайлак тушибди. Югуриб бориб лайлакни тузокдан чиқарибди, лайлак одамдек сўзламокка бошлабди:

— Чол, мен лайлакларнинг бошлигиман, мени кўйиб юбор, нима тиласанг шуни бераман. Менинг маконим шу каршидаги тоғнинг орқасида. «Лайлаквойнинг уйи қаерда», десанг, ҳамма айтиб беради, — дебди.

Чол лайлакни кўйиб юборибди. Эртасига эрталаб туриб, Лайлаквойнинг совгасини олиб келиш учун йўлга тушибди. Юриб, юриб бир жойга бориб етибди. Кўй бокиб юрган чўпонлардан:

— Бу кўйлар кимнинг кўйи? — деб сўрабди.

— Бу кўйлар Лайлаквойнинг кўйи, — деб чўпон чолни йўлга солиб юборибди. Бир жойга бориб йилки хайдаб юрган йилкичидан:

— Бу йилкилар кимники? — деб сўрабди чол. Йилкичи:

— Лайлаквойники, — дебди.

— Лайлаквой менга совга ваъда қилиб эди, нима сўрай? — деган экан, йилкичи бундай дебди:

— Лайлаквойнинг бир хумчаси бор, «кайна, хумча» деса, тилла кайнаб чиқади, шу хумчани сўра, — дебди.

Чол оз юриб, кўп юриб, кўп юрса ҳам чўл юриб, етти кеча-ю, етти кундуз деганда Лайлаквойнинг уйига бориб етибди. Эшикдан кириб:

— Ассалому алайкум, — дебди. Лайлаквой:

— Хап саломинг бўлмаса, таъзирингни берардим. Сен совга учун келган бўлсанг керак, кани, нима сўрайсан? — дебди.

— Мен сиздан: «Кайна, хумча»ни сўрайман, — дебди чол. Лайлаквой ўйлаб қолибди:

— Чол, сенга бир тилла товок берай, — деса ҳам чол кўнмабди. Ахир «Кайна, хумча»ни беришга рози бўлибди. Чол «Кайна, хумча»ни олиб жўнабди. Йўл юриб, чўл юриб, бир жойга етибди. Дам олиш учун ўтирибди. Кишлоқнинг болаларига қараб: «Ўгилларим, мана бу хумчага қараб турунглар. Мен бир оз мизгиб олай, факат «кайна, хумчам», деманглар», деб тайинлабди.

Болалар: «Кайна, хумчам», деб бақиришган экан, хумдан тилла кайнаб чиқибди, шошиб-пишиб, болалар тиллаларни йигиб олишибди-да, хумни уйларига олиб кириб бекитиб кўйибдилар. «Кайна хумча»нинг ўрнига бошқа бир хумчани олиб келиб ўтирибдилар. Чол уйкудан туриб хумчани олиб жўнабди. Етти кеча-етти кундуз йўл юриб, уйига етиб келибди. У:

— Кани, кампир, дастурхонни ёз, хозир тиллага бой бўламиз, — дебди.

Кампир дастурхонни ёзибди, дастурхоннинг ўртасига хумчани кўйиб, чол бор кучи билан: «Кайна, хумчам», деб бақирибди. Хумчада тилла кайнаб чиқмабди, чол яна бақирибди, тилла кайнамабди. Чолнинг жахли чиқиб: «Ха, падарингга лаънат, Лайлаквой, алдаб бошқа хумча берибди. Эртага бориб бошқа совга сўрайман», деб кўйибди.

Эртаси сахарлаб чол йўлга чиқибди. Йилкичининг олдига бориб:

— Лайлаквой мени алдади, энди нима совга сўрай? — дебди.

Йилкичи ўйлаб туриб:

— «Очил, дастурхон»ни сўранг, дастурхонни ёзиб, «Очил, дастурхон», десангиз хар хил таомлар тайёр бўлади, — дебди.

Чол Лайлаквойнинг эшигидан кириб:

— Ассалому алайкум, — дебди.

Лайлаквой:

— Хап саломинг бўлмаса, таъзирингни берардим. Ўтган гал сенга «Кайна, хумча»ни бериб эдим, кўнглинг тўлмадими? — дебди. Чол хамма воқеани айтиб:

— Мени алдадинг, «Кайна, хумча»нинг ўрнига бошқа хумча берибсан, энди сендан «Очил, дастурхон»ни сўрагани келдим, — дебди.

Лайлаквой ўйлаб қолибди. «Очил, дастурхон»ни чолга совга қилибди.

Чол йўлга тушибди. Оз юриб, кўп юриб, ўтган гал дам олган кишлокка бориб етиб, ўзи таниш бўлган болаларни кўрибди.

— Ўғилларим, мана шу дастурхонни олиб ўтиринглар. Мен бир оз мизгиб олай, факат «очил, дастурхон», деманглар, — деб уларга тайинлабди. У кетгандан сўнг болалар: «Очил, дастурхон», деб бакирган эканлар, етти хил таом тайёр бўлибди. Болалар таомларни ўраб, дастурхонни уйларига олиб кириб, ўрнига бошқа дастурхон олиб чиқиб ўтирибдилар. Чол қайтиб келиб дастурхонни олибди, йўлга тушибди. Уйига келиб:

— Кампир, нима таом десанг, хозир тайёр бўлади, — деб дастурхонни ёзибди. «Очил, дастурхон», деган экан, ҳеч қандай таом чиқмабди. Чолнинг жони чиқиб:— Лайлаквой мени иккинчи марта алдади, эртага бориб бошқа бир совга сўрай, — дебди.

Эртаси сахарлаб чол йўлга чиқибди. Йилкичининг олдига бориб:

— Энди Лайлаквойдан нима сўрай? — дебди.

— Энди Лайлаквойдан «Ур, тўқмоқ»ни сўранг, душманингиз кўпга ўхшайди, агар «Ур, тўқмоқ», десангиз олдингизда ким бўлса, уриб ташлайди, — дебди йилкичи.

Чол йўлга тушибди, эшикдан:

— Ассалому алайкум, — деб кирибди. Лайлаквой:

— Хап саломинг бўлмаса, таъзирингни берардим. Яна пима учун келдинг? «Кайна, хумча»ни олдинг, «Очил, дастурхон»ни олдинг, яна нима керак? — дебди.

— Мени бу гал ҳам алдадинг, Лайлаквой. «Очил, дастурхон» ўрнига бошқа бир дастурхон берибсан. Энди сендан бир нарса сўрайман, менга «Ур, тўқмоқ»ни бер, — дебди. Лайлаквой чолга «Ур, тўқмоқ»ни ҳадя қилибди.

Чол «Ур, тўқмоқ»ни олиб йўлга тушибди. Оз юриб, кўп юриб аввалги ўзи билган кишлокка бориб етибди. Таниш болаларни чакирибди:

— Ўғилларим, мана бу тўқмоқни ушлаб туринглар, мен бир оз мизгиб олай, факат «Ур, тўқмоқ», деб гапирманглар, — дебди.

У кетгандан сўнг болалар кизиқиб: «Ур тўқмоқ», деб бакиришган экан, тўқмоқ хаммасини ура бошлабди. Болаларнинг бакиргани учун чол югуриб келибди. Болалар бўлса, йиглашиб:

— Жон ота, тўқмоқни тўхтатинг, биз сизнинг хумчангизни, дастурхонингизни олиб, ўрнига бошқа хумча, бошқа дастурхон кўйган эдик, тавба қилдик, ота, тўқмоқни тўхтатинг, — дейишибди.

Чол: «Тур, тўқмоқ» деб бакирган экан, тўқмоқ уришдан тўхтабди. Болалар югуриб бориб уйларида «Кайна, хумча» билан «Очил, дастурхон»ни чиқариб берибдилар, чол йўлга тушибди. Оз юриб, кўп юриб, кўп юрса ҳам мўл юриб, кўл демай, чўл демай етти кеча-етти кундузда уйига бориб етибди.

«Кайна, хумча» деган экан, хумчадан тилла қайнаб чиқибди. «Очил, дастурхон», деган

экан, хар хил таомлар мухайё бўлибди. Умриларида кўрмаган таомларни еб, чол билан кампир хурсанд бўлибдилар.

Тиллаларга чол яхши уй солдирибди ва хонни уйига меҳмондорчиликка чакирган экан, хон: «Мен хон бўлсаму, ўша камбагал, кашшок чолнинг уйига меҳмондорчиликка бораманми», деб бормабди.

Чолнинг жахли чикиб хонни урушга чакирибди. Эртасига хон етти минг аскарни тайёрлаб, чолнинг уйи олдига тизиб:

— Кани, чол, жонинг бўлса урушга чик! — дебди. Чол эшиқдан чикиб тўқмоқка караб:

— Ур, тўқмоқ! — деб бакирган экан, тўқмоқ хамма аскарларни биттадан уриб ёткизиб кўйибди, охирида тўқмоқ хонни ура бошлабди.

Хон:

— Чол, тўқмогингни тўхтат, сен енгдинг, мени ўлимдан олиб кол, юртга сен хоким бўла кол, — дебди.

Чол тўқмоқни тўхтатибди. Ўзи юртга хоким бўлибди. Муроди максадига етибди.